

UNDAKI

Tshe Eli Anyanya

1 Aui w'Undaki, on'a Davidi, khum'ekanga ka Jerusalema. 2 Anyanya w'anyanya, mbata Undaki. Anyanya w'anyanya: tshe eli anyanya! 3 Waho akona watukundjaka untu uma lu pa tshe katunduyaenyaka la yanyi?

4 Lolonga lomotshi latetaka, lukina latuyakaka, ku kete yatutshikalaka pundju. 5 Unya atuhutoka, atudjaka; atusamanyaka utsha lene atuwuhutoka. 6 Lopepe latopepeka utsha la diku dia kushi, latukadimoka utsha la ngel'a kushi. Lo latutetemalaka ntshimbala, ku lo latukalulaka lu ahuli alo, watulutshimbaka. 7 Ekedti tshe watulambulaka ashi a waki, keli ashi a waki hawutululaka. Vo watokolamelaka nkela utsha lu dihuli diatuwukelaka. 8 Diango tshe diambolemba l'ulimu wuhu wahakuuntu mvuta: Ashu hawoseke mena, atui hawuheko mbuka. 9 Kene kakiko, kayuyala ntu; la kene kakanthama, kayutshama ntu. Nduku dikambu di'uyuyu l'esi ulungu. 10 Undi, untu mbeyaka mvuta ati: Nyendi engo kene, to keli uyuyu? Mete, engo keku kambuyalaka edja. To kakiko lu nonga yaket la ntundu kasu. 11 Akambu wayuyala l'okongo a nshi motshi, wane wayuto nshi kina, hauwauhu.

Akambu Wakenyi Undaki

12 Dimi, Undaki, laki khum'ekanga ka Isariyele la Jerusalema. 13 Dimi lakadji utema dia nyanga la nkemba la yimba, kene tshe katutshamaka l'esi ulungu: ulimu wakashaa Unyashungu antu dia ntsha la kete weli wutshu. 14 Dimi lakenyi elimu tshe wambutshama l'esi ulungu, ku vo tshe anyanya atu, pudi nduku engo. 15 Kene keli dikutu hakieyi nsimbo, la kene kahako, hakieyi mbalema.

16 Dimi lakati l'utema ami nti: Mete, dimi lambuhama lu yimba uleki waku tshe wakulekaka la ntundu kami la Jerusalema. La utema ami ambena akambu efula wa yimba ndu wa ewu. 17 Dimi lakadji utema

dia nimbitela yimba, la dia nimbitela akambu w'enginya ndu wa djeli. Ku dimi lakashihudia nti: Ndu dikambu ne dieli uku untu latatshanya lopepe. 18 Len'eli yimba, katuyalaka ohenyohenyo. La one latuhamiaka ewu kandi, katuhamiaka okei andi.

2 Dimi lakatela utema ami nti: Tutshu! layukedika la ongenongeno; okone ongenengene. Keli ndu dikambu so dieko anyanya. 2 Dimi lakati dia tola nti: To teli enginya! la dia ongenongeno nti: Waho akona weli loko? 3 Dimi lakashishima utema ami, dia vo nombola dimba diamila yimba, dia dimi ngenangena la wanu, la dia dimi nkimela utshatsha edja ndu lam'ayumulimbitela kene keli ololo dia antu ntshaka l'esi ulungu nshi tshe ya lumu lawo. 4 Dimi lakatshi elimu efula, lakayahikela mvudu, lakayaunela dikambo dia vinyo. 5 Dimi lakayatshela dikambo la dikambo di'elua, lakuni etamba w'elua wa wehu la wehu. 6 Dimi lakayatshela eduwa, dia ndoyaka ukunda, lene atulaka etamba. 7 Dimi lakasumbi fumbi y'apami ndu y'amantu, yakuti ana efula lakami. Dimi laki la nyimba ya ngombe la ya ekoko, yuleki ya waku waki la ntundu kami la Jerusalema. 8 Dimi lakayamotshiya ndu fesa la paunyi ndu ekundji wa khumi ya dikanga la wa lu beke. Dimi lakakundja emimbi w'apami la emimbi w'amantu, la wehu tshe wa dihumahuma diatongenyanenyaka antu.

9 Dimi lakayala wuki wuki, uleki waku tshe waki la ntundu kami la Jerusalema. Ndu yimba yami yakatshikala kame la mi. 10 Kene tshe kakakomiya ashu ami, ku dimi mbashato. Dimi kunyima utema ami nduku ongenongeno, ne dia utema ami akangenangenaka lu elimu tshe wakamatshaka. Oso aki waho ami una l'elimu ami tshe. 11 Ku dimi lakakan yimba lu elimu tshe wakatshaka anya ami, ndu pa kakamenaka dia mbetsha. Tshe anyanya atu, uku untu latatshanya lopepe. Nduku waho wa nkundja antu lu kene katshawo l'esi

ulungu.

12 Ku dimi lekediya ashu ami utsha lu yimba, utsha lu akambu w'enginya la wa djeli. Kakona kayutsha one layukita khum'ekanga? Aha kene kambutshamaka edja uka? 13 Dimi lakenyi nti: Yimba ndeka akambu w'enginya oloло, uku uleki usasi udjima. 14 Ashu wa kanga yimba watuyalaka l'ote andi. Keli dimi lakayulimbitel nti: Dikambu dia wuhu otoi diatuyalaka le wo vo ahendi. 15 Ku dimi lakati l'utema ami nti: Akambu watuyalaka le kanga enginya, watuyakaka ndu le mi. Dikambu kuna diulekimi yimba? Ku dimi lakati l'utema ami nti: Ndu dikambu ne dieko anyanya. 16 Euhwelu ka kanga yimba eli uku kanga enginya, to kema pundju. Lu nshi yayai, akambu tshe wakatshama wayuhamema. Yi! kanga yimba atuvokaka uku kanga enginya! 17 Ku lakahetsha lumu lami, ne dia ulimu watushamaka l'esi ulungu weli wutshu le mi. Tshe eli anyanya, uku unto latatshanya lopepe.

18 Dimi lakahetshaka elimu tshe wakamatshaka l'esi ulungu, wakamahumbi ntshikela one layunkita. 19 Akona eya kana ndi ayuyala kanga yimba kana enginya? Ndi ayulela diango tshe diakamatshi uma la yimba yami l'esi ulungu. Ndu dikambu so dieko anyanya. 20 Dia ko mbakamanya utema, mbakamayala la ukiyanu, ne dia ulimu tshe wakamatshaka l'esi ulungu. 21 Untu omotshi atutshaka ulimu la yimba, la ewu ndu la uluwanyi. Ku ndi atutshikelaka unto laki kunkamba waho w'ulimu andi. Ndu dikambu so dieko anyanya, ndu kolo ka wuki. 22 Waho akona watukundjaka unto uma l'ulimu andi tshe, ndu uma l'ohenyohenyo w'utema andi, wakandakomoka dimba l'esi ulungu? 23 Ne dia nshi yandi tshe yatuyalaka paka asui, la ulimu andi paka okei. L'utshu, utema andi hawutuyalaka la mumuya. Ndu dikambu so dieko anyanya.

24 Nduku diese diuleki le unto uku nde la no, la ngenyangenya utema andi l'ulimu andi. Keli lakenyi nti: Ndu dikambu ne diambuya uma lu lunya la Unyashungu. 25 Akona ukuki nde, la ngenangena naka aha dimi? 26 Ne dia Unyashungu atushaka one latongenyangenyaka yimba, ewu la ongenongeno. Keli ndi atushaka utshi a kolo ulimu wa nsanganya la motsha, dia mbisha one latongenyengenyaka Unyashungu. Ndu dikambu so dieko anyanya, uku unto latatshanya lopepe.

Etena ka Engo la Engo

3 Engo tshe keko la etena kato, dikambu tshe l'esi ulungu dieko la etena kadio: 2 etena ka mbuto la etena ka mvo; etena ka mune la etena ka muna; 3 etena ka ndjaka, la etena ka nkonya; etena ka mpandjula, la etena ka mpika; 4 etena ka ndela, la etena ka mbola; etena ka utanda, la etena ka no wenyi; 5 etena ka mbikadja ave, la etena ka nsanganya ave; etena ka nkhumbatanelia, la etena ka nkimo nkhumbatanelia; 6 etena ka nyanga engo, la etena ka nshisha; etena ka mumba, la etena ka mbikadja; 7 etena ka mbatshatsha, la etena ka ntela; etena ka nembohala, la etena ka nteketa; 8 etena ka mbukana ngandji, la etena ka mpetshana; ndu etena ka ta, la etena ka ki. 9 Waho akona watukundjaka one latukambaka uma lu pa kandi?

10 Dimi lakenyi ulimu wakashwa Unyashungu antu dia vo ntsha. 11 Ndi akatungi engo tshe dimena lu etena kato, ndi akasha antu tshe kanyi ya pundju lu etema awo. Keli wuhu wahakuki unto mbeyaka ulimu watushaka Unyashungu uma l'etatelu utsha l'ekumelu. 12 Keli dimi mbeyaka nti: Nduku diese diuleki le wo, uku ngenangena la ntsha oloло lam'ekiwo la lumu. 13 Ushasha wa Unyashungu le unto tshe one: nde, no la ngenangena l'ulimu andi. 14 Dimi mbeyaka nti: Kene tshe katutshaka Unyashungu, kayutshikalaka pundju: nduku layahe, ndu nduku layunya. Unyashungu kambutsha okone di'antu mbuka woma la ntundu kandi. 15 Akambu wa kakiane, wakiko edjedja; la kene kayuyala nshi kina, kambuyalaka. Unyashungu atukaluyaka kene kaketi.

Akambu Wahasimbo wa Lumu

16 Dimi lakenyi ntu l'esi ulungu nti: Lu dihuli di'elumbwelu kolo keko laawo, la lu dihuli dia sambu k'ololo kolo keko laawo. 17 Dimi lakati l'utema ami nti: Unyashungu ayulumbuya antu w'ololo ndu antu wa kolo; ne dia dikambu tshe la ulimu tshe weko la etena kawo. 18 Dimi lakati l'utema ami lu dikambu di'antu nti: Unyashungu atwaedikaka dia mbaenya ati: Nyama mbewo, 19 ne dia dikambu diatuyakaka le unto, ndu ne diatuyakaka le nyama, dieko pupu. Uku atuvokaka omotshi, mbatuvokaka ukina. Vo tshe weko la lumu wuhu otoi. Untu haleki nyama; ne dia tshe eko anyanya. 20 Vo tshe watushokaka lu dihuli diame. Vo tshe wakatungama uma lu ditshu, okone vo tshe watukululaka lu ditshu. 21 Akona

UNDAKI

eya kana lumu l'untu latumbelaka utsha l'ulungu, kana lumu la nyama mbatuhuloka l'esi lu kete? 22 Osoku dimi lakenyi nti: Nduku engo kuleki ololo le unto, uku dia ndi ngenangena l'ulimu andi. Oso eli etenyi kandi. Akona ayuwela ntu dia ndi ndjena akambu wayutshama l'okongo andi?

4 L'okongo diku, dimi lakenyi asui tshe watuyalaka l'esi ulungu, ndu lakenyi asoi a wane watuwusuyaka. Keli nduku untu atasambaka. Lu leke l'asuyanyi awo kaki wulu, ku nduku untu lasamba. 2 Okone dimi lakandula wane wakavu edja uleki wane wasena, weki la lumu. 3 Ee, dimi lakaleki ntumbula one lahatayala, ndu lahatenyi akambu wa kolo watutshamaka la tshina di'lulungu uleki ane kana akina.

4 Ku dimi lakenyi nti: Ulimu tshe la yimba tshe y'ulimu yeko paka kandjema k'untu le unyandi. Ndu dikambu so dieko anyanya, uku untu latatshanya lopepe.

5 Kanga enginya atokomaka anya, atolekaka emuryi andi hita.

6 Ambuleka ololo lunya ndjala too la mumuya, uleki anya ahendi ndjala too l'ulimu, uku untu latatshanya lopepe.

7 Dimi lakakadimo, lakenyi anyanya l'esi ulungu. 8 Untu omotshi eko leli ndame, nduku ukina leli l'onongo andi. Ndi kema la ona pami kuyanga onangu, keli ulimu andi watayala l'ekumelu, kuyanga ashu andi nduta ukundji; ne dia ndi atuyambulaka l'utema andi ati: Akona akambelami ulimu, ndu kahumbiami utema ami ongenongeno? Ndu dikambu so, dieko anyanya ndu kolo.

9 Antu ahendi ndeka untu otoi, ne dia vo watulungulaka difutu di'ololo uma l'ulimu awo. 10 Naka vo wamboko, omotshi mbeyaka mbetula unyandi. Keli eko lunyangu le one leli ndame, lamboko, laha la untu ukina dia mbetula. 11 Pupu, naka antu ahendi wambetama kame, vo watohetshahetshanya. Keli one leli ndame, ukundi ayunduyahetshahetsha? 12 Naka pami kemotshi ayuleka one leli ndame wulu, antu ahendi mbeyaka mbuleka wulu, la ushinga weli la ekodi esatu haweyi mpimbo esadi.

13 Olongo, a pami wa wula ndeka khum'ekanga k'usumbi ndu k'enginya, lahayeya nunga tukanyi, ololo, 14 ne dia ndi mbeyaka ntumba uma lu luudu la lukanu dia ndjulela, lu diulelu diandi diku kakanduto wula. 15 Dimi lakenyi wasena tshe watokendakenda l'esi ulungu, waki

kame la olongo a pami uku, lakahumbi nkita khum'ekanga ndu lakulela lu dihuli diandi. 16 Nduku ekumelu keko le wudja uku tshe, le waku tshe wakindi ote awo. Ku tena tshe wane wayuyakaka l'okongo andi, hawongenangena dikambu diandi. Ndu dikambu so dieko anyanya, uku untu latatshanya lopepe.

Ntshika Dokoloko Shashimuya Eko Enginya

5 Ualamaki dikaka diaye lam'ayuyotoka lu luudu la Unyashungu. Nsukana dia mbuka, ambuleka nkimo elambu w'akanga a dinginya ololo; ne dia vo haweyi vati: Kolo katshawo. 2 Tusamanyaki dia ndjhila unyo. Utema aye tawusamanyaki dia mvuta diiu la ntundu ka Unyashungu, ne dia Unyashungu eko l'ulungu, ku we la kete. Okone aui aye wayalaki yema tshitshe.

3 Do diatuyakaka kame la akambu efula, la oteketa wa kanga enginya watukemaka l'atei w'asui efula.

4 Lam'atshikelaye Unyashungu dokoloko, tutshimbashimbaki dia ndishidiya, ne dia ndi hatulangaka akanga a dinginya. Kushidiya dokoloko diakayatshiki. 5 Aha ntshika dokoloko, ndeka ntshika dokoloko ku hadishidisha, ololo. 6 Tetawoki unyo aye munganya dimba diaye, kuyanga mvuta la ntundu ka dikendji dia Unyashungu vati: Uku aki munga. Okoko wana wayuka Unyashungu aui aye kele, ndu ukukindi nanya ulimu w'anya aye?

7 Anyanya ndjalaka lu alo efula ndu lu aui efula, keli we ukaki Unyashungu woma.

Anyanya wa Lumu

8 Naka we menaka sui di'usi wula la enyelu ka sambu k'ololo la akambu w'usimbwi lu leke lomotshi la wudja, tukashimoki dikambu so, ne dia untu la wuki atulamemaka le one lûleki wuki. Ku ladiku diawo, keli wane waleki waki. 9 Keli lu akambu tshe, khum'ekanga keli waho le wudja w'akambi wa dikambo.

10 One latukaka falanga ngandji, hatuyilutaka; la one latukaka ukundi ngandji, hatunduyaka saki ka waho ayo. Ndu dikambu so dieko anyanya.

11 Lam'atufulanlaka diango, ndu andeshi adio watufulanlaka. Waho akona watukundjaka kangadio uma loko, tshikima diendala la ashu utu?

12 Djo y'ukambi yatuyalaka longovungovu, kana yema tshitshe mbulendi

kana efula, keli elutelu ka kanga ongonyi hatuladiaka djo.

13 Kolo ka wuki kakamenyi l'esi ulungu kene: ekundji watulamemaka dia ntshela kangawo kolo. 14 Ekundji ako watuishishoka lu ulimu w'anyanya, ndi ambuta ona, ku nduku engo lu anya andi. 15 Uku akandatumbi utakataka uma l'utema a nyangu, wuhu aka mbayundukalula utsha lene akandayi, ndu hosa nduku engo uma l'ulimu andi, kuyanga nkikimela lu lunya landi. 16 Ndu dikambu so dieko kolo ka wuki. Uku akandayi, mbayundutsho. Waho akona watuyalaka le ndi lam'atundukambelaka lopepe ulimu? 17 Dikambu dikina, lu nshi ya lumu landi tshe, ndi atolekaka lu udjima, ndu atuyalaka la lunyangu efula, kandi la yenyi.

18 Nyulungi dikambu diakamenyi. Le untu, engo k'ololo ndu ka dimena, eli nde, no, la ngenangena l'ulimu tshe watundutshaka l'esi ulungu, lu nshi ya lumu landi tshe yakawusha Unyashungu. Oso eli etenyi kandi. 19 Keli naka Unyashungu akasha untu ukundji la ongonyi, naka ndi ambuwusha wulu wa ndi nde uma loko, la mbosa etenyi kandi ndu dia ngenangena lu ulimu andi, oso eli ushasha wa Unyashungu. 20 Ndi huleka mbuho nshi ya lumu landi, ne dia Unyashungu atuludiaka l'ongenongeno l'utema andi.

6 Kolo kemotshi kakamenyi l'esi ulungu keli wutshu le antu kene: 2 untu latulungulaka ukundji, ongonyi la lutumbu uma le Unyashungu ndu lahatuhumbiaka utema andi kene kalangandi. Keli Unyashungu hatuwushaka wulu wa nde uma loko, ku ongendangenda ndjole diango diako. Dikambu so dieko anyanya ndu kolo ka wuki. 3 Naka untu ayuta ana lukama, ndu ambulumba deku efula dia nshi yandi ndjala efula efula, keli utema andi haluti diese, ndu hakundja diumbu, dimi lambuta nti: Ona uhasa mbuleka ololo. 4 Ona uhasa aka watutumbaka utumbatumba, atutshokaka lu udjima, la lukumbu landi haluteyamaka. 5 Kuyanga ndi komena unya, kana mbulimbitala, ndi ambukundja mumuya uleki pami kako. 6 Kuyanga untu uku ambulumba deku nunu pendi, naka ndi henyi olo, vo ahendi hawutsho lu dihuli diame uka?

7 Ulimu tshe watutshaka untu eli dikambu dia unyo andi, keli ndjala kandi hatushilaka. 8 Waho akona watukundjaka kanga yimba uleki kanga enginya?

Waho akona watuyalaka le omenyi fono, latuyakimelaka la ntndu ka wasena? 9 Kene katenaka ashu, ndeka kene kakumbula ololo. Ndu dikambu so dieko anyanya, uku untu latatshanya lopepe.

10 Kene kakiko, kambolemaka lukumbu edja; la wuhu weli untu, mbeyamaka. Ndi heyi nsemanela la one luleki wulu. 11 Naka akambu efula weko, keti anyanya ndeka. Waho akona watukundjaka untu uma loko? 12 Untu akona eya kene keli ololo le untu? Nshi tshe ya lumu landi l'anyanya yatetaka uku dedi. La akona ayeya mvutela untu kene kayuyala l'okongo andi l'esi ulungu?

Edikelu ka Yimba la Enginya

7 Lukumu l'ololo ndeka malashi ololo, la lushi la nyoi ndeka lushi la mbuto ololo. 2 Dia ntsho utsha lu luudu l'utanda ndeka ntsho utsha lu luudu la dambu ololo; ne dia oso eli ekumelu k'untu tshe. Okone one lasena alami dikambu so l'utema. 3 Uma l'elundji ka lunyangu katuyalaka utema la ongenongeno. 4 Utema wa kanga yimba watuyalaka lu luudu l'utanda. Keli utema wa kanga enginya watuyalaka lu luudu l'ongenongeno. 5 Dia mbuka luhangan la kanga yimba ndeka mbuka usambu w'akanga a dinginya ololo. 6 Uku atuyalaka etundutundwelu k'atende lu dja l'esi a puki, mbatuyalaka tola to kanga enginya. Ndu dikambu so dieko anyanya. 7 Wengiya eteteka kanga yimba enginya, la mbu y'utshu atulanyaka utema. 8 Ékumeli ka dikambu ndeka etetelu kadio. Utema wa memakana ndeka w'utaku ololo. 9 Tukaki yenyi esadi, ne dia yenyi yatuyalaka lu etema w'akanga a dinginya. 10 Tumbulaki wati: Okoko wana wakaleki nshi ya ntndu nshi nye ololo? Ne dia aha uma lu yimba kambulaye umbula oso. 11 Yimba yeli ololo uku sangu. Yo ndeka ololo le waku watenaka unya. 12 Dedi dia yimba diatukumbaka untu uku dedi dia falanga. Waho wa ewu eli dia yimba nama untu leli la yo. 13 Enda ulimu wa Unyashungu. Akona eya nsimbula kene kakandengamia?

14 Lu lushi la diese, ongenangenaki; lu lushi la pa, ukankaki yimba. Unyashungu kakätungi vo ahendi, ne dia untu atukeya kene kayuyala l'okongo andi.

15 Akambu ane tshe mbakamenaka lu nshi yami y'anyanya. Untu l'ololo atuvokaka lu ololo andi, la untu la kolo atulumbaka lu kolo kandi. 16 Totekoyaki ndjala ololo efula, kuyanga ndjaete kanga yimba efula. Okoko wana wukukiye ndjalanya okone?

UNDAKI

17 Totekoyaki ndjala kolo efula, kuyanga ndjala kanga enginya. Okoko wana wukukiyemvo ntundu etena kaye atakuki? 18 Olole we nkimeka dikambu ne tudikimoki; ne dia one latukaka Unyashungu woma, ayutumba uma l'akambu aso tshe.

19 Wulu watukundjaka kanga yimba uma lu yimba, ndeka w'uma le ewandji dikumi wa l'usumba.

20 Mete, nduku untu l'ololo leko lu kete, latutshaka ololo utu, latatshaka kolo.

21 Tuhukamaki aui tshe watutaka antu, ne dia utukuyuka ukambi aye akotenga; 22 ne dia utema aye mbuhoka tena efula diakayatengaka akina.

23 Dimi lakedika akambu ane tshe la yimba, lakati nti: Dimi layuyala kanga yimba, keli yo yeko etali uma le mi. 24 Kene katuyalaka, keko etali, ndu ohongo wahayama. Akona eya nkilimbetela? 25 Dimi lakakan yimba dia mbitja utema dia nyanga, nshishima, la nimbitela yimba la akambu uku wewo, la dia mbeya ati: Akambu wa kolo weko djeli, la akambu w'enginya weko epoka. 26 Dimi lakanani umuntu luleki nyoi ululu, leli la utema andi djunga la otei, ndu leli la anya andi ekodi. One latongenyangenyaka Unyashungu, ayuhanda. Keli utshi a kolo ayundama le ndi. 27 Nyendi akambu wakamatani, mbata Undaki, lam'akamedikaka dikambu la dikambu dia mbamana fundu. 28 Nyulungi, engo katumuyangaka, dimi latakitani edja ndu kakiane. Dimi lakanani pami ka yimba otoi l'atei w'apami kinunu. Keli l'atei w'amantu tshe, nduku otoi. 29 Dikambu otoi: nyulungi dikambu diakamatani, Unyashungu akatungi untu l'usimbiwi. Keli vo watuyangaka akambu efula wa mbactoya.

8 Akona eli uku kanga yimba? Akona atulimbitelaka tukitshimudi t'akambu? Yimba y'untu yateteka elundji kandi ngaingai, ngala k'elundji kandi katukadimoka.

2 Dimi nti: Ulamaki elembe wa khum'ekanga, ndu etshibeli kakayatshibela Unyashungu. 3 Tusamanyaki dia mumo uma lasuki la ndi. Tutetemalaki ntsha kolo ne dia ndi atutshaka kene kalangandi. 4 Diui dia khum'ekanga dieko wulu. Akona ukuki mbumbula ati: Katshaye na? 5 Untu latulamaka elembe andi, hatuhumoka lukulu l'engeno. Utema a kanga yimba atulimbitelaka etena la elumbwelu. 6 Dikambu tshe dieko la etena kadio la elumbwelu kadio, ne dia asui w'untu weli wulu le ndi. 7 Ndi heyi kene

kayuyala l'okongo andi. Akona ayuwutela uku ayutuyala? 8 Nduku untu eli khum'a lumu landi, dia mbeya lukimela, kuyanga wulu wa nsekola lushi landi la nyoi. Nduku etshungwelu keko lu to ne, ndu kolo heyi mbushimbela uma loko. 9 Dimi lakenyi akambu ane tshe, lakadji utema ami lu kene tshe katutshamaka l'esi ulungu. Etena keko ka untu mbulela unyandi dia mbusuya.

10 Ku dimi lakenyi antu wa kolo wakundjaka waumbu, wakoto lu mumuya. Keli wane wakatshaka akambu w'usimbiwi, wakamo uma lu dihuli di'ekila, wakuhamelu l'usumba. Ndu dikambu so dieko anyanya.

Akambu wa Lumu Kema Pupu

11 Ehimbwelu k'akambu wa kolo hayala esadi. Diako mbatalulaka etema w'antu too la pusa ka ntsha kolo. 12 Kuyanga untu a kolo ambutsha kolo tena lukama ndu ambatalula nshi yandi, mete, dimi mbeyaka nti: Waku watukaka Unyashungu woma, wayuhumo lukulu l'olo, ne dia vo watukaka woma la ntundu kandi. 13 Keli diese huyala le untu a kolo. Ndi hutulula nshi yandi uku didjidji, ne dia ndi hatukaka woma la ntundu ka Unyashungu.

14 Dikambu di'anyanya diatuyalaka lu kete ne: Antu w'ololo watukundjaka kene katukundjaka antu wa kolo; la antu wa kolo watukundjaka kene katukundjaka antu w'ololo. Dimi lakanati nti: Dikambu so dieko anyanya. 15 Ku dimi lakanani ongenongeno, ne dia nduku diese dieli le untu l'esi ulungu, diuleki nde, no, la ngenangena; ne dia ongenongeno ako ayutshikalala la ndi l'ulimu andi lu nshi ya lumu yakawusha Unyashungu l'esi ulungu.

16 Lam'akamedikaka utema dia nimbitela yimba la dia menda elimu watutshamaka ladiku dia kete, ne dia omotshi eko latulalaka djo la yanyi kuyanga l'utshu, 17 dimi lakenyi elimu tshe wa Unyashungu. Ku lakenyi nti: Untu heyi nimbitela ulimu watutshamaka l'esi ulungu. Kuyanga untu ayokomo dimba okomokomo dia mbuyanga, ndi heyi mbushula. Kuyanga usi yimba nangaka mbulimbitela, ndi heyi mbushula.

9 Dimi lakedji utema dia nsedingula akambu ane tshe. Dimi lakenyi nti: Antu w'ololo, akanga a yimba la elimu awo tshe weko lu lunya la Unyashungu. Kana dikambu so dieko dikambu dia ngandji kana dikambu dia luhetsu, nduku untu leya: tshe eko la ntundu kawo. 2 Akambu tshe watuyakaka

pupu le antu tshe. Dikambu dia wuhu otoi diatuyakaka le untu l'uluwanyi ndu le untu a kolo, ndu le untu leli ololo la pudipudi ndu le untu la mindu, le one latulambilaka ulambu ndu le one lahatulambilaka. Uku atuyalaka dikambu le untu ololo, mbatudiyalaka ndu le untu a kolo, le one latutshibaka uku le one latukaka woma dia ntshiba. 3 Dikambu ne dieko kolo l'atei wa kene tshe katutshamaka l'esi ulungu. Wuhu otoi wa dikambu mbeli le antu tshe. Etema w'antu weli too la kolo. Akambu wa djeli weko lu etema awo lam'ewo la lumu. L'okongo diku, vo watutshokaka utsha lu Dihuli di Edu. 4 One latuyalaka l'atei a wasena, eki la elungamelu; ne dia fo kasena ndeka tambwe kambuvu ololo. 5 Wasena mbeyaka vati: Vo wayuwo. Keli wavo haweyi nduku dikambu. Vo kema la difutu. Euhwelu kawo kambushila. 6 Ndu ngandji kawo, luhetshu lawo, ndu okomiya awo ambushilaka edja. Vo hawuyala la etenyi ntu pundju lu kene tshe katutshamaka l'esi ulungu.

7 Utshu, utuli ma diaye l'ongenongeno. Utono wanu aye l'utema w'ongenongeno, ne dia Unyashungu ambetawoka ulimu aye.

8 Ahondo aye wayalaki paka wema utu. Ote aya tawuhumbaki iso.

9 Ongenangenaki la wadeye, latuyukaka ngandji nshi ya lumu laye tshe y'anyanya, yakayalungula l'esi ulungu. Nshi yaye tshe yeli anyanya; ne dia oso eli etenyi kaye lam'ekiye la lumu, l'ulimu watutuytshaka l'esi ulungu. 10 Kene tshe kayena lunya laye dia ntsha, kukitshi la wulu aye; ne dia nduku ulimu kuyanga kanyi, ewu kuyanga yimba, yeli lu Dihuli di' Edu, lene atayatshu.

11 Dimi lakenyi ntu l'esi ulungu nti: Luwangu kema le andawi, la ta kema le akanga a wulu, dia nde kema la akanga a tokomba. 12 Untu hateyaka etena kandi nduku yema. Uku attundamaka nsi lu otei wa nyoi, ndu fudu lu tulunga, osoku mbatundamaka antu lu etena k'elanyelu, lam'akumato shashimuya le wo.

13 Dimi lakenyi ndu djimbitelu ya wuhu one wa yimba, yakamambia cfula l'esi ulungu. 14 Usumba omotshi wa tshitshe wakiko, waki la antu atoi. Khum'ekanga kemotshi ka wuki akayi dia ndjolosha, aküdingi, akühikela wumbe wa ta. 15 Usi wula omotshi, kanga yimba, aki l'usumba aksa, akashimbela usumba uma lu yimba yandi. Keli nduku untu akhuo usi wula aksa. 16 Ku dimi lakati nti: Yimba ndeka wulu ololo. Keli antu watonyolaka yimba y'usi

wula, ndu hawutulungaka aui andi.

17 Aui wa kanga yimba watuwulungaka la ki ndeka ehanguhangu wa one latulekaka l'atei a dinginya ololo. 18 Yimba ndeka dihumo dia ta ololo. Keli utshi wa kolo otoi mbeyaka nanya diango efula.

Ololo wa Yimba Wuleki

10 Edu wa tshingu watohondjaka iso k'utshi wa malashi. Yimba y'enginya atulanyaka yimba la nemo. 2 Utema wa kanga yimba watuyalaka lu lunya landi la pam, Keli utema wa kanga enginya watuyalaka lu lunya landi la lomoso. 3 Lam'atokendakenda kanga enginya lu mbuka, ndi hatuyalaka la ewu. Ndi atutaka dia untu tshe ati: Enginya kendi. 4 Naka umbuledi ambukuka kele, tunelaki uma lu dihuli diaye; ne dia memakana katushimbaka kolo ya waki.

5 Dimi lakenyi kolo kemotshi l'esi ulungu uku munga kakayi uma le umbuledi. 6 Enginya katudjaseka lu dihuli dia nemo, la ongonyi lu dihuli dia l'esi.

7 Dimi lakenyi fumbi yahemi lu falasa, ku ewandji wakendakenda lu kete uku fumbi. 8 One latshima wawu, ayutambela loko. One lanyukula eheli ka lukumbu, ayulumatema ului. 9 One latukambaka ulimu w'ave, vo wayuhumuya. La one latataka etamba, ayukala wali loko. 10 Naka kenge yambutshuna, ku untu hayidji diesa, Dieli la ndi dia nfudia wulu. Keli yimba atukimanyiaku untu. 11 Naka ului ambushila numata untu, Nduku uhumba wa mbeta kanga ahindu ntu. 12 Aui wa kanga yimba watuhumuyaka lukulu l'olo, Keli elomo wa kanga enginya watutungelaka elanyelu.

13 Etatelu k'aui uma l'unyo andi weli utata, La ekumelu ka aui andi eli enginya ka wulu. 14 Epoka katufudiaka aui. Ndu untu leya akambu wayuyala l'okongo andi? 15 Ulimu wa kanga enginya watuhukuyaka, ne dia ndi heyi ntsho utsha l'usumba. 16 Kete li, ndi lunyangu le ye, lam'eki khum'ekanga kaye dikenda, ndu lam'atolekaka ewandji aye la pindju li! 17 Kete li, ndi ongenengeno le ye, lam'eli khum'ekanga kaye ona pam a antu wayudjasedi, Ndu lam'atolekaka ewandji aye lu etena k'ololo, Dia nkundja wulu, aha dia mbidjo li! 18 Lam'atuyalaka anya yoo, ote wa luudu watengamaka. Ndu lam'eli anya la shuwasuwa, luudu latuselaka. 19 Antu watolekaka dambu dia ndjangenyangena, watonokaka wanu dia

ngenyangnya lumu, la falanga yatukukaka lu akambu tshe. 20 Tolokaki khum'ekanga kuyanga lu tukanyi taye. Tolokaki kanga ongonyi kuyanga l'atei a luudu laye la mbetama, Ne dia fudu ka l'ulungu mbeyaka memba diui diaye, kana engo keli la ahafu mbeyaka ntuta aui aye.

11 Ukadja ma diaye la diku di'ashi, ne dia we ayuditana l'okongo a nshi kambi. 2 Udikahanya le esambeli kana le enanei, ne dia we heyi kolo kakona kayuya lu kete. 3 Lam'atululaka wangi la ashı, vo watoloshaka mvula la kete. Lam'atunyukoka utamba utsha la diku dia kushi kana utsha la ngel'a kushi, vo watutshikalaka lu dihuli diakawakwe. 4 One latendaka lopepe hune, la one latendaka wangi hani.

5 Uku ahayeyi mbuka ka lopepe, ndu uku ahayeyi wuhu atuhamaka weka l'utema wa kanga diemi, osoku mbahayeyi ulimu wa Unyashungu, latutshaka akambu tshe.

6 Uneki wuhu aye la pindju. Tushaki lunya laye mumuya la dikolo, ne dia we heyi kana kene kana keku kayuluwana, kana vo ahendi wayula ololo.

7 Usasi eko dimena, ashı ngenangenaka dia mena unya. 8 Naka untu ayulumba deku efula, ndi angenengene lu deku diako. Keli ndi uhoki nshi ya udjima, ne dia yo yayuyala efula. Kene tshe katuyakaka, keli anyanya.

Daku le Dongolongo

9 Olongo a pami li, ongenangenaki lu nshi yaye y'olongolongo. Utema aye akongenyangenyaki lu nshi yaye y'olongolongo. Okendakendaki lu saki y'utema aye ndu lu nangu ya ashı aye. Keli eyi wati: Lu akambu ane tshe, Unyashungu ayuketa lu elumbwelu.

10 Okone unya lunyangu uma l'utema aye ndu kolo uma lu dimba diaye, ne dia nshi y'etatelu ka lumu y'olongolongo yeli anyanya.

12 Okone uhoki utungi aye lu nshi yaye y'olongo a pami, ntundu nshi

ya kolo yatakuki, ndu deku diatasukana diayuyuta wati: Dimi halongenangena ladio. 2 Ntundu unya, usasi, ngondo la toto watadimala, la wangi watakalula l'okongo wa mvula; 3 ntundu ka lushi layudidima alami wa luudu, layukutama apami wa wulu, ndu layuheko atoshi ne dia vo kema efula, layuyala ashı a wane watendaka uma lu adidishi enguli; 4 ntundu ka lushi layudihama kuki ya suku di'osese, layukitakita lundju l'etwelo, layunela unto la limbu la fudu, ndu layukitshakitsama ana amantu watimbaka esambu; 5 ntundu ka lushi layuwuwa akambu wa l'ulungu woma, la woma wa mamba wayuyala lu mbuka, la utamba wa amande wayoto alembı, ndu dikati diayuyala wutshu, la saki yayushila ne dia unto, ne dia unto lutsha ntsho utsha l'edjaselu kandi ka pundju; la asi utanda wayeteta lu esese; 6 ntundu okodi wa fesa atahimbo, kana donga dia paunyi diatule, kana mbaka atule lu eteko, kana utshimbi watukutulaka ashı uma lu difuku atahimbo; 7 ntundu ditshu diatakalula lu kete, lene akidio, la lumu latakalula le Unyashungu lakawushalo. 8 Anyanya w'anyanya, mbata Undaki, tshe eko anyanya.

Ulimu Tshe wa Untu

9 Dikambu dikina, ne dia Undaki aki kanga yimba, ndi akatemala mbetscha antu ewu. Ndi akayangi, akani yimba, akakondola tukedi efula. 10 Undaki akayangi aui w'amena, akafundi aui wa mete la utema w'usimbwi.

11 Aui wa kanga yimba weli uku atende, la ului wa tukedi w'uma le ulami otoi weli uku seti yokokomadi wulu. 12 On'ami, ewo akambu akina ladiku dia ane. Efundelu k'abuku hashili; wekelu efula nkomolaka dimba.

13 Akambu tshe wambukema, nyulungi ekumelu ka dikambu. Uki Unyashungu woma, ulamaki elembe andi. Oso eli okende w'untu tshe. 14 Unyashungu ayela akambu tshe l'elumbwelu, ndu akambu wushami kana ololo kana kolo.